

02 MARTIE
RUGACIUNEA 3
SF. IERARH
ARSENIE AL TVERULUI

Молитва третья

О всехвальный святителю Христов и чудотворче, отче Арсение! Не забуди нас, чад святых обители твоея и всех с верою и любовию прибегающих к раце честных и многоцелебных мощей твоих, но поминай нас во святых твоих и благоприятных молитвах к Богу. Моли за вся христиане, отче святителю Арсение, и за святую сию обитель, юже вручи тебе Пречистая Владычица Богородица, мним бо тя выну предстояща Христу Богу нашему и Пречистой Его Матери и имуща велие к Ним дерзновение. Аще бо телом и преставился еси от нас, но душою жив сый, неотступен пребываеши с нами духом. Сохраняй нас твоим предстательством пред Престолом Небеснаго Царя от козней вражиих, от соблазнов мира, во зле лежащаго, и от всякия скорби и нужды. О преблагий пастырю и учителю наш, отче Арсение! К тебе припадаем и тебе молимся, молися всесильному

Богу о пользе душ наших, и испроси нам время на покаяние, да очистившись от всякия скверны греховныя, Небесному Царствию наследники сподобимся быти со всеми праведными, от века угодившими Господу нашему Иисусу Христу, Емуже подобает всякая слава, честь и поклонение со Безначальным Его Отцем и с Пресвятым Духом, ныне и присно и во веки веков. Аминь.